


Nos hendenan

Special

Skirbi
pa
Mercedes Abdul

Dika Fingal-Feliciano:

Un dama culto cu un don pa conversa



"Lifestyle" ta un programa bon scucha y hopi gusta na Aruba, cual ta worde transmiti pa e radioemisor 12.70 AM stereo, y cual ta capta atencion di e radioschuchanan na henter Aruba.

Dika Fingal ta conduci e programa aki, y awe, e ta nos persona invita den nos espacio "Nos hendenan special".

SCHOOL Y TRABAO

Dika su nomber berdadero ta Lidwiska Ludwina Feliciano. Dika a cuminsa school na Aruba, pero na edad hoben el a bay biba cu su famia na Hulanda. Eynan el a termina su school basico y avanza. Despues el a bin Aruba atrobe, unda el a bay Colegio Arubano. Na Hulanda el a gradua den ramo administrativo na MEAO.

El a traha den administracion di un empresa di 'fastfood', na un aerolinea y den accounting di un hotel. Na 1991 el a bolbe Hulanda pa motibo di especializacion di su casa. Mientrastanto el a sigui curso na Amsterdam, den tela, combinacion di material pa tela, estilo di moda y accesorio en general. Awor aki e ta traha riba su mes den ramo di moda clasico moderno y casual. Acerca e ta presenta y produci e programa

'Lifestyle' na radio 12.70 AM stereo. Tur mainta di dialuna pa diabierna e ta ricibi invitado den su programa di 8.15 te 10.00.

"LIFESTYLE"

Dika nunca antes a yega di traha na radio, ni den ramo di duna informacion. Tampoco nunca Dika a pensa di haci esaki. Dika ta conta con el a cuminsa.

"Un anochi mi tabata den combersacion cu Shirley Angela-Eisden, cu awor ta mi colega, anto na dado momento meymey den combersacion Shirley a drai bisa... Pero ta bo mes ta e persona cu mi ta busca. Mi ta busca asina leu, mientras cu e ta asina cerca. El a splica den lineanan grandi tocante Lifestyle. En corto, Shirley a propone pa mi presenta e programa di Radio 12.70. Mi prome reaccion tabata: ami, cu ni den un studio mi no a yega di bay? Pero m'a pensa cu si ta SHIRLEY ANGELA-EISDEN, cu pa mi ta E periodista number 1, ta mira un talento den mi, wel ta algo pa pensa riba".

Y awor aki Dika tin 3 aña y mey cu Lifestyle. Na comienzo el a pasa den e material di estudio di comunicacion cu su casa a specializa aden. E material

aki ta encera entre otro estudio di uso y traha programa riba diferente topico informativo y educativo pa medianan di comunicacion. Cu sosten di su casa y gran ayudo di Shirley, Dika a sa di desaroya su talento y habilidad pa saca informacion di un y pase pa otro. Dika tin un caracter masha sincero, cariñoso y calm. Un habilidad grandi cu Dika tin ta scucha hende. E tin tambe un don pa pone un hende sintie na cas y relaha. Asina e informacion ta sali di mes y na un manera espontaneo. Ta pesey un oyente cu scucha e programa ta haya e impresion cu e tambe ta di bishita cerca Dika.

KICO TA "LIFESTYLE"?

"Lifestyle ta un programa informativo. Por scuch'e riba 12.70 AM cu ta e emisora cu un programacion informativo. E programa tabata existi caba dia mi a cuminsa. Lifestyle ta nos sistema di bida, con nos ta anda cu otro, con nos ta come, bisti, move, kico nos ta papia y pensa, nos pasatempo y gozo, nos puntonan fuerte y debil, enseñanza, educacion, cultura, arte... en fin, tur cos cu tin di haci cu nos bida diario. E programa ta na papiamento y ta pa tur hende di tur nivel".

Tambe Dika a relata con e ta prepara su programa. E meta di e programa ta pa trece tur clase di informacion na oido di publico. Tur siman e tin un average di 8 pa 10 invitado. Tin biaha sa tin topico cu mas cu un invitado pareu. E ta lesa hopi pa prepara su topiconan. E ta tene su mes na altura di informacion internacionalmente. Tambe di programan y revista den e mesun ramo cu e programa di dje.

"Por lo menos un siman adelantanta mi ta stipula mi topiconan y scoje mi invitadonan. Mi ta combersa cu nan prome na telefon of ta reuni cu nan. Asina ta sali e lin grandi di e programa. Mi ta busca informacionnan adicional y na cas mi ta hinca e programa den otro".

Pa hinca un programa bon den otro ta tuma su debido tempo y dedicacion. E programa tur dia p'e ta un reto nobo. Nunca e ta hisa benta cu un topico. Tin ora un programa no por sigui debi na forza mayor di un invitado cu na ultimo ora no por mas y ta cancela e cita.

META DI E PROGRAMA

E meta di e programa ta pa duna informacion riba nivel Dika ta bisa cu tabatin masha hopi reaccion super positivo. "Algun topico cu a resalta durante e ultimo temporada ta entre otro: Menopause, Astrologia, Paña interior di hende homber y hende muher, tambe e seccion 'Profile politico' durante temporada di eleccion, e programa pa eclipse total di solo y recien e combersacion cu un musico Arubano a haya bastante reaccion. En general mi ta haya hopi bon reaccion tur dia, sin embargo mi no ta kere cu ta tey un hende mester yega. Mi ta traha duro pa mantene e nivel di e programa y pa sobrepasa y mehora su calidad.

Locual ta hopi importante den e mundo di radio ta, cu bo mester tin bo propio estilo y no bin cu imitacion. Semper bo mester ta para habri pa cosnan nobo. Nunca bo no ta cla".

Dika ta conoci te na Corsow y Bonaire, ya cu e tin masha oyente na e hermana islanan, cu ta scuch'e fiel tur mainta y cu ta yam'e pa duna reaccion. Dika sa sinta tambe pa su colega Shirley pa e programa 'Mas lat mainta' presenta hunto cu Z86 di Corsow.

"Importante pa mi ta pa mantene bo mes na altura di cosnan cu ta pasa rond di bo y pa bo duna informacion riba un bon nivel na bo oyente. Esey

ta e compromiso cu bo tin cu bo mes y cu bo publico".

PAPIAMENTO

Dika a bay curso nacional di papiamento y periodismo y tabata sa di saca bon beneficio di esaki.

"Tabatin hopi herment util pa cualkier cu kier mehora su presentacion den medianan di comunicacion. Lamentablemente cu tin hopi cu no a haci uso di e oportunidad aki y ta machicando e papiamento keto bay. Pa mi, Papiamento ta algo masha masha importante mes, ya cu mi programa ta na papiamento y nos tur ta papiamento di cas nos ta domina".

Dika a co-produci y presenta e programan di GP3 na Tele Aruba y esaki tambe tabata un reto nobo p'e.

"Presenta un programa na television ta algo completamente diferente cu radio. Aki bo mester tin dominio di expresion di cara y curpa, y trece e mensahe pa publico cu ta mira bo, mientras na radio esaki no ta e caso".

SU FAMILIA, NA PROME LUGAR

Dika ta mama di Cecily di 5 y Tony-John di 2 aña. E ta casa cu Johnny Fingal. Su famia ta na prome lugar, su casa ta banda di dje. Dika por combina bastante facil su trabao cu atencion pa su famia. Mainta ora e yiu nan ta na school e ta presenta su programa. Su casa ta docente di school y asina nan tin basta ora pa hunto nan por guia y educa nan yiu nan, locual nan ta haya sumamente importante.

Loke Dika ta haya hopi importante ta cu e y su casa tin hopi contacto cu school di nan yiu nan, ya cu nan ta kere den un educacion paralelo na bienestar di desaroyo di un mucha. Nan ta activo tambe den grupo di mayor na school. Su casa ta dun'e sosten y curashi den tur cos cu e ta haci. Su casa ta esun cu tin cu tend'e semper y duna reaccion ora e pensa un topico fuera di lo comun. Nan tin interes den loke cada un ta haci y ta comparti tur cos hunto. Nan interes general tin hopi semehanza. Dika ta gusta cushina. E ta amante di arte general, moda y cosnan di nos propio cultura. Su pasatempo mas ameno ta combersa y esey ta refleha tur mainta den su trabao na radio 1270 AM stereo.

Telefon di
DIARIO
826747